

ADY AMIN'NY TSY FANDRIAMPAHALEMANA

Jiolahy niomana hanafika, lavon'ny mpitandro filaminana ny iray

Jiolahy niomana hanafika no maty voatitifitry ny mpitandro filaminana tany Mendrikolovana, kaominina Alasora distrikan'Antananarivo Avaradrano. Tato anatin'ny herinandro dia nisy ny fisafoana nataon'ireo zandary, ny vondrom-paritry ny fandriampahalemana Antananarivo renivohitra ary ny zana-tobim-paritra Alasora. Paik'ady maro samihafa no nentina nanatanteraka izany. Izany dia fepetra noraisina, mba hanafoanana ny vaky trano, ny fiparitahan'ny zava-mahadomelina ao anatin'ny faritra manodidina ny kaominina Alasora. Nahomby ny tetika, nody ventiny ny rano natsakaina. Jiolahy iray no maty voatitifitry ny zandary, ny talata hariva teo, tany Mendrikolovana, ao anatin'ny kaominina Ala-



Ilay jiolahy lavo voatitifitry ny zandary teny Alasora.

sora. Raha ny fanazavan'ireo zandarimariampirenena any an-toerana, dia miisa 3 ireo jiolahy nikasa hanafika tao Mendrikolovana, tokony ho tamin'ny 9 ora alina. Hatreto dia mbola tsy fantatra ny tokantrano saika ho tafi-

han'izy ireo. Nidina ifotony avy hatrany ny zandary nanao ny fisafoana manodidina ny kaominina, ka tra-tehaka tamina trano iray efa tsy misy mipetraka ireo jiolahy miisa telo. Nitsoaka avy hatrany ireo olon-dratsy na dia efa

nampitandremina aza. Voatery nitifitra ny zandary, ka lavon'ny bala ny iray tamin'izy ireo ary maty teo noho eo, tafaportsaka kosa ny roa hafa. Ankoatra izay dia nahitana fitaovam-piadiana mahery vaika teny an-tan'ilay jiolahy voatitifitra, basy poleta mitondra ny marika Colt, kalibra 7,65 m/m, izay misy bala telo, efa nogiazina ireo fitaovana ireo. Mitohy kosa ny fanarahan-dia ataon'ny mpitandro ny filaminana ary ny hahatratrana ireo olon-dratsy no tanjona. Mbola manentana ny fokolonona ao anatin'ny kaominina izy ireo, mba hifanome tanana hatrany. Hilaza raha misy trangana tsy fandriampahalemana miseho eny anivon'ny fiarahamonina.

Stefa

Tsy fandriampahalemana

Raimpianakaviana hita faty niaraka tamin'ny bisikiletany

Miseho lany ny tsy fandriampahalemana amin'izao fotoana any amin'ny distrikan'Arivonimamo farit'ltasy. Sokajina ho faritra mena amin'ny tsy fandriampahalemana ihany koa noho ny afitsok'ireo olon-dratsy ny an-toerana ankehitriny. Mandry tsy lavo loha ny fokolonona ary tsikaritra nahazo vahana ny vono olona. Ny tranga niseho ny harivan'ny alahady 29 mey 2022 lasa teo, no tena nampivarahontsana ny mponina. Lehilahy iray, eo amin'ny 47 taona eo, no hita faty tany Alatsi-



Ilay raimpianakaviana hita faty.

nainy Loharano, ao anatin'ny distrikan'Arivonimamo, hita faty niaraka tamin'ny bisikiletany. Raha ny nambaran'ireo fianakaviana dia efa hariva

no niala tao an-trano ity raim-pianakaviana ity, ary nikasa hihazo an'Ambatnapoaka. Teny an-dalana izy no niantso ny tany an-trano, tamin'ny alalan'ny

finday mba hisana sakafo hariva. Ora maro taorian'izay anefa tsy tonga ity raim-pianakaviana ity. Nikoropaka ny tao an-trano, ka nampandre ny fokolonona. Rehefa natao ny fihazana dia ny vatana mangatsiakany sisa no hita. Nahitana ratra ihany koa ny tenany ary nisy tsinay niboraka. Tombanana ho valifaty no nahazo azy, hoy ireo fianakaviany. Efa nisy ny fanadihadiana nataon'ny mpitandro filaminana mikasika ity raharaha ity, andrasana ny tohiny.

Niaina

31 mey

Tsy voahaja ny tsy fifohana sigara sy tsy fihinanana paraky

Toy ny isan-taona, marihina isaky ny 31 mey ny andro eran-tany natokana tsy ifohana sigara, sy tsy ihinanana paraky. Toy ny isan-taona ihany koa anefa, tsy voahaja hatrany izay fanentanana ny olona tsy ifoka sigara, sy tsy ihinanana paraky

izay, mbola lavitr'ezaka ny hetsika mahakasika izay. Ny "Sigara sy paraky enfa dia loza mitatao ho an'ny tontolo iainantsika": manodidina ny 3.5 tapitrisa hektara isan-taona eo ny tany simba noho ny fambolena paraky ary

mbola mitoetra, ho isan'ny olona lehibe, ho an'ny fahasalamam-bahoaka manerantany ihany koa ny fihinanana paraky sy fifohana sigara, satria mahatratra 8 tapitrisa isan-taona eo ireo aina afoy vokatr'izany. Maherin'ny iray tapitrisa amin'ireo

dia maty vokatry ny fievhana tsy nahy ny setro-tsigaran'ny hafa. Raha ho antsika eto Madagasikara manokana dia manodidina ny 8300 isan-taona ireo olona maty vokatry ny fifohana sigara sy fihinanana paraky. Araka ny fanadihadiana natao tamin'ny taona 2018 dia fantatra fa ny tahan'ny fifohana sigara eo amin'ny ankizy 13 hatramin'ny 15 taona dia nahatratra 11,3%, raha 14,8% kosa izany ho an'ny vehivavy ary 38,7% ho an'ny lehilahy. Faritra valo ankehitriny, no efa nananganana komity manokana miady amin'ny fifohana sigara sy fihinanana paraky (CCoLAT) ary mbola hitohy ny fananganana izany any amin'ny faritra hafa. Tamin'ity taona ity, naneloana ny CHUJRA Ampefiloha ny fankalazana ofisialy ny Andro manerantany tsy ifohana sigara sy tsy ihinanana paraky teto Madagasikara afak'omaly.

Stefa



Hetsika nandritra ny fankalazana ny 31 mey, ny talata teo.

Fjkm Ambohimadana Firaisana

Tratra ny tanjona tamin'ny voka-dehibe teo

Nisongadina nandritry ny fanatanterahana ny voka-dehibe tao amin'ny Fjkm fitandremana Ambohimadana Firaisana, synodamparitany Antananarivo atsinanana fa tratra ny tanjona, dia ny ezaka kitapo iombonana izany. Nifanome tanana ny reni-fiangonana sy zanakana ampielezana tamin'ny tonona sy vokatry samihafa, ho fanatanterahana ny vinan'ny fiangonana. Ny mpitandrina eo an-toerana, Andriantsarafara Mamiarizaka no nitarika ny fotoana sy nitondra ny hafatr' Andriamanitra ny Alahady 1 Mey 2022 lasa teo. Nitohy ny 28 Mey ny hetsika, izay niarahana tamin'ny zanaky ny fiangonana sy ny tarika « Ny Fanilo » sy ny mpandihiny, izay notanterahina teny an-toerana ihany. Mbola tafiditra ao anatin'ny ezaka kitapo iombonana hatrany io hetsika io. Nambaran'ny mpitandrina, fa hitohy ny ezaka manaraka toy ny fanitarana ny fiangonana sy ny fanatsarana ny foto-drafitr'asa samihafa izay mila fanavaozana ihany koa. Hanatanteraka fetin'ny taranaka indray izy ireo ny volana Aogositra ho avy izao. Raha ny Alahady 1 mey teo dia niavaka ny fotoana, satria taorian'ny fandraisana ny fanasan'ny tompo sy ny lavantim-bokatra, dia fiaraha-misakafo no namaranana ny fotoana ary mbola nifanentana hatrany amin'ny ezaka manaraka. Mbola nanamafy izay fiarahana sy fifanotronana izay koa ny biraom-piangonana, Randriamitsiry José. Hipoka ny fiangonana hatreny an-tokontany satria fotoana-dehibe iny voka-dehibe iny ny 1 Mey 2022 lasa teo.

Rajo



Fjkm Ambohimadana Firaisana.

FJKM IVOANJO Finoana

Tratra ihany koa ny tanjona tamin'ny voka-dehibe

Hipoka ny FJKM IVOANJO FINOANA Anosiala Ambohidratrimo, Synodamparitany Antananarivo andrefana, ny alahady 29 Mey 2022 lasa teo. Fanompoam-pivavahana notarihan'ny Mpitandrina RAMANOELINA Jean Evariste, raha ny prezida synodaly, ny Mpitandrina RAZAFINDRAKOTO Andriambalohery Hasinarivo, no nitondra ny hafatr' Andriamanitra, izay notsoahina tao amin'ny Salamo 104 : 33 a- 34 a manao hoe: « Hihira ho an'i Jehovah aho raha mbola velona koa, ho maminy anie ny fisainako azy ». Tsy adino ihany koa ny niarahana ireo reny rehetra, ka nislotena nitondra ny fisaorana sy fiarahabana ny vadin'ny prezida synodaly ho an'ireo reny rehetra tsy ankanavaka, indrindra fa ny reny tao amin'ny Fjkm Ivoanjo finoana. Ankoatr'ny rodo-rodo tamin'ny raki-panambinana dia nahatratra valo tapitrisa ariary mahery ny vola azo noho ny voka-dehibe 2022 teny an-toerana, izay hanatanterahana ny adidy izay tanjon'ny fiangonana. Ankoatr'ireo mpino kristiana sy ny zanaka ampielezana dia nanotrona ny fotoana ihany koa ireo mpitandrina misotro ronono, sy ny katekista delege, izay manao stage eo an-toerana any hitondra ny Fjkm Antoby avaratra. Lavantim-bokatra sy sakafom-pifaliana, no namaranana ny fotoana, taorian'ny fandraisana ny fanasan'ny Tompo.

Rajo



Ireo nitarika ny fotoana tao amin'ny FJKM Ivoanjo Finoana.